

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj : 32 0 St 429890 22 St
Tuzla, 11.11.2022. godine

OPĆINSKI SUD U TUZLI, sudija Ilvana Delić, u postupku predhodnog ispitivanja prijedloga za otvaranje stečajnog postupka nad dužnikom „FARMACOP“ doo Čelić, za proizvodnju, trgovinu i usluge, ul. Vražići bb, sa podružnicom „Farmacop“ doo Čelić, za proizvodnju, trgovinu i usluge, Koraj bb, Lopare, dana 11.11.2022. godine donio je slijedeće,

R J E Š E N J E

POKREĆE SE PRETHODNI POSTUPAK radi utvrđivanja uslova za otvaranje stečajnog postupka nad imovinom privrednog društva „FARMACOP“ doo Čelić, za proizvodnju, trgovinu i usluge, ul. Vražići bb, sa podružnicom „Farmacop“ doo Čelić, za proizvodnju, trgovinu i usluge, Koraj bb, Lopare.

Za privremenog stečajnog upravnika imenuje Maja Musemić iz Tuzle, ul. Maršala Tita 60.

Privremeni stečajni upravnik dužan je odmah po prijemu rješenja o imenovanju preduzeti radnje utvrđene odredbom člana 63. Zakona o stečaju, a naročito:

- obezbijediti imovinu dužnika i starati se o istoj,
- ima ovlaštenja da uđe u poslovne prostorije dužnik i provede neophodne radnje,
- utvrditi da li postoji razlog za otvaranje stečajnog postupka,
- ispitati da li će imovina stečajnog dužnika pokriti troškove stečajnog postupka,
- utvrditi da li se poslovanje stečajnog dužnika može u cjelini ili djelimično nastaviti u toku prethodnog postupka i
- uraditi kontrolu poslovanja stečajnog dužnika.
- kada je podnosilac prijedloga za otvaranje stečajnog postupka stečajni dužnik, dostaviti izjašnjenje da li je stečajni dužnik, odnosno organ ovlašten za zastupanje stečajnog dužnika podnio prijedlog za otvaranje stečajnog postupka u roku od 60 dana od dana nastupanja platežne nesposobnosti.

Privremeni stečajni upravnik dužan je podnijeti svoj pismeni izvještaj ovom sudu u roku od 30 dana od dana donošenja ovog rješenja u kome će izvijestiti ovaj sud o preduzetim radnjama i iznijeti svoje stručno mišljenje o tome da li postoje razlozi za otvaranje stečajnog postupka, odnosno da li postoje bilo kakvi izgledi za nastavak daljeg poslovanja dužnika.

Mjere pojedinačnog prinudnog izvršenja pokrenute protiv stečajnog dužnika se obustavljaju, izlučna i razlučna prava povjerioci ne mogu ostvariti u predhodnom postupku, stečajni dužnik ne može raspolagati budućom stečajnom masom bez saglasnosti privremenog stečajnog upravnika i suda, a sve to u cilju osiguranja buduće stečajne mase.

Rješenje će biti objavljeno u „Službenim novinama F BiH“, web stranici Općinskog suda u Tuzli i na Internet stranici FIA-e, te se pozivaju povjerioci da privremenom stečajnom upravniku bez odlaganja dostave prijedlog mjera osiguranja na predmetima stečajnog dužnika koje će eventualno zahtijevati.

Ovo rješenje će se dostaviti Odjeljenju registra ovog Suda, Zemljišno-knjižnom uredu Općinskog suda u Tuzli i Službi za geodetske i imovinsko-pravne poslove Općina Čelić, radi upisa zabilježbe otvaranja prethodnog postupka.

O b r a z l o ž e n j e

„FARMACOP“ doo Čelić, za proizvodnju, trgovinu i usluge, ul. Vražići bb, kao dužnik podnio je dana 17.08.2022. godine ovom sudu prijedlog za otvaranje stečajnog postupka nad ovim privrednim društvom, zbog platežne nesposobnosti stečajnog dužnika.

Stečajni sudija nakon što je utvrdio da je prijedlog za pokretanje stečajnog postupka podnesen od strane ovlaštenog predlagača u smislu odredbe člana 58. stav 1. i 2. Zakona o stečaju („Sl. novine F BiH“, br.53/2021. u daljem tekstu Zakon o stečaju) i da je isti dopušten, dana 28.09.2022. godine, naložio je predlagaču da uplati novčana sredstva na ime predujma finansiranja troškova prethodnog postupka radi utvrđivanja uslova otvaranja stečajnog postupka.

Predlagač **„FARMACOP“ doo Čelić, za proizvodnju, trgovinu i usluge, ul. Vražići bb**, je dana 10.11.2022. godine dostavio sudu dokaz o uplati predujmljenih sredstava za finansiranje prethodnog postupka u iznosu od 4.000,00 KM.

Na osnovu priložene dokumentacije i to: prijedlog za otvaranje stečaja 17.08.2022. godine, rješenje o registraciji od 07.06.2010. godine, rješenje o izmjenama podataka od 07.02.2012. godine, aktuelni izvod iz sudskog registra od 13.04.2017. godine, uvjerenje o poreznoj registraciji od 14.06.2010. godine, izvještaj o računima poslovnog subjekta od 16.08.2022. godine, bilans stanja na dan 31.12.2021. godine, bilans uspjeha za period od 01.01.2021. godine do 31.12.2021. godine, izvještaj o gotovinskim tokovima od 01.01.2021-31.12.2021. godine i uplate predujma od 4.000,00 KM, predlagač je učinio vjerovatnim platežnu nesposobnost.

Na ročištu za saslušanje stečajnog dužnika održanog dana 28.09.2022. godine, zakonski zastupnik društva izjavio je da je društvo prestalo sa radom danom donošenja odluke o prestanku rada društva, svi radnici su objavljeni, i on kao direktor prestao s radom u Maju 2022. godine. Trenutno ima menadžerski ugovor i tako je angažovan u društvu. Društvo ima pokretnu imovinu i to dio laboratorijske opreme. Nekretnina društvo nema. Računi su blokirani od strane Porezne uprave i Sberbanke. Dugovanja društva se sastoje od obaveze po kreditima koji su uzeti od banke, prema veterinarskom zavodu Tuzla, dug prema poljoprivrednicima za mlijeko (dobavljači), manji dug prema Poreznoj upravi, kao i dug prema UIO oko čega se sporimo kod suda BiH. Pokrenuta je tužba protiv Kantonalne agencije robnih rezervi Sarajevo za dug

od 60.000,00 KM kod Općinskog suda u Sarajevu, par izvršenja kod suda u Gradačcu cca 25.000,00 KM i još nekih izvršenja gdje čekamo naplatu potraživanja.

Ukupna dugovanja društva prevazilaze iznos od 350.000,00 KM. Društvo ima jednu podružnicu u Koraju Opština Lopare koja dugo ne radi niti ima bilo kakvih obaveza na podružnici.

Iz svega navedenog proizilazi da društvo nije u mogućnosti izvršavati svoje dospjele obaveze od momenta dospijea u neprekidnom trajanju dužem od 30 dana od dana nastanka obaveze. Konačno stanje u pogledu eventualno drugih obaveza bi se moglo utvrditi u slučaju određivanja privremenog stečajnog upravnika koji bi sudu dostavio izvještaj o poslovnom stanju kod predlagача sa izjašnjenjem o uslovima za otvaranje stečaja.

Na osnovu podnesene dokumentacije i zakonskog zastupnika stečajnog dužnika, sud nije u mogućnosti da sam procijeni postojanje svih neophodnih uslova koje Zakon predviđa za otvaranje stečajnog postupka, te se donosi rješenje o pokretanju prethodnog postupka radi utvrđivanja uslova za otvaranje stečajnog postupka nad dužnikom, temeljem odredbe člana 61. stav 1. Zakona o stečaju.

Odluka iz stava 3. ovog rješenja donesena je temeljem odredbe člana 63. Zakona o stečaju, a nakon što je utvrđeno da privremeni stečajni upravnik ispunjava uslove za imenovanje utvrđene odredbom člana 71. Zakona o stečaju.

Na osnovu navedenog, temeljem citiranih odredbi zakona, sud je odlučio kao u izreci rješenja.

SUDIJA
Ilvana Delić

POUKA O PRAVNOM LIJEKU: Protiv ovog rješenja dozvoljena je žalba u roku od 8 (osam) dana, računajući od dana objavljivanja. Žalbu mogu uložiti stečajni dužnik i privremeni stečajni upravnik. Žalba se podnosi Kantonalnom sudu putem ovog Suda.